

फिलेमोनयात पावलं चवःगु पौ

म्हसीका

फिलेमोन छम्ह नांजाःम्ह विश्वासी खः। व कलस्सीइ चवंगु मण्डलीया दुजः जुइमा। व ओनेसिमस धाःम्ह दासया मालिक खः। व दास फिलेमोनया छैनं बिस्युं वंगु खः। वं पावलयात नाप लात। उबलय् पावलयात भयालखानाय् कुनातःगु खः। पावलया पाखें व विश्वासी जुल। पावलं फिलेमोनयात थ्व पौ व हे दासया बारे चवयातःगु खः। पावलं पतिइ फिलेमोनयात व दासयात लितछ्वया हयाचवना, उकिं वयात दास थें मखु बरु थः हे किजा थें यानाः छैय् दुका, छायाःसा आः व नं छम्ह विश्वासी जुइ धुंकल धकाः इनाप यानातःगु दु।

धलः पौ

न्हाखँ	१-३
फिलेमोनया नितिं प्रार्थना याःगु	४-७
ओनेसिमसया बारे इनाप याःगु	८-२२
क्वचाय्कूगु	२३-२५

फिलेमोन

पावलपाखें ज्वजलपा

१ ख्रीष्ट येशूया नितिं कैदी जुया चवनाम्ह पावल व भी विश्वासी किजा तिमोथीयापाखें जिमि यःम्ह पासा व छगू हे ज्या याना चवम्ह फिलेमोन, २ व विश्वासी केहें अप्पिया व भीपिं थें ख्रीष्टयागु ज्या याना चवम्ह अर्खिप्पस व छिमिगु छेंय् मुं वइपिं विश्वासीतय्त ज्वजलपा।*

३ भी परमेश्वर बाः व प्रभु येशू ख्रीष्टं छिमित दया माया व शान्ति बियादीमा।

फिलेमोनयागु माया व विश्वास

४ प्रार्थना यायेबलय् जिं छन्त लुमंकाः न्ह्याबलें प्रभुयात सुभाय् बियाचवनागु दु। ५ प्रभु येशू ख्रीष्ट व फुक्क विश्वासीतय्त छं उतिकं माया व विश्वास यानाचवंगु खँ जिं न्यनागु दु। ६ ख्रीष्टयात विश्वास यानाः काःगु ज्ञानयात छं अज्ज बांलाक थुइका वने फयेमा धकाः जिं प्रार्थना यानाचवनागु

दु। ७ यःम्ह किजा, छं विश्वासीतय्त माया याःगु खँ न्यनाः जि तसकं लय्तायागु दु, अले साहस नं कयागु दु। छं परमेश्वरया मनूतय्त तसकं लय्ताय्कूगु दु।

ओनेसिमसया नितिं बिनति याःगु

८ विश्वासय् किजा जूगुलिं जिं छन्त माःमाःगु खँय् उजं बी फु। ९ अय् नं माया यानाः जिं छन्त बिनति यानाचवना। आः ला जि बुह्हा नं जुइ धुंकल, अले ख्रीष्टया नितिं थथे कुंका नं चवनागु दु।

१० जिं छन्त जि काय् ओनेसिमसयागु नितिं थथे बिनति यानाचवनागु खः। जिं वयात भयालखानाय् हे विश्वास याकाः जिम्ह काय् यानागु खः।* ११ न्हापा ला व मनू छन्त छुं हे ज्यालगय् मजूम्ह खः। आः धाःसा व छन्त नं जितः नं ज्यालगय् जुल।

१२ जिं वयात छन्थाय् हे लिछ्वयाहया चवना। व जिगु नुगःचु थें खः।

१३ वयात जि नाप हे तये मास्ति वःगु

खः। भिंगु खँ न्यंकाः भयालखानाय्
लाःबलय् छंगु पलेसा वयात हे जितः
ग्वाहालि यायेत जिथाय् तयेगु खः।
१४ अय् नं छंके मन्यंकं थथे यायेगु
जितः बांलाः मताल। जिं छन्त छुं नं
ज्याय् कर याये मखु, छं स्वयाः यःथें
या। १५ छुं ई तक ओनेसिमस छ लिसे
बाया चवने माल। उकिं छं आः वयात
सदां थः थाय् तये दइ। १६ आः वयात
दास धकाः मतिइ तये मते, बरु थः
हे किजा धकाः मतिइ ति। जितः व
खनाः तसकं माया वं। थः दासं नापं
विश्वास याःगुलिं छन्त व खनाः भन
गुलि माया वन जुइ।

१७ छं जितः पासा धकाः गथे
दुकायेगु खः, वयात नं अथे हे दुका।
१८ वं छन्त छुं मखुगु याःगु दुसा, अले
छंके छुं कयातःगु दुसा जिगु नामय्
चवया ति। १९ जि पावलं, थःगु हे
ल्हातं चवयाचवना — जिं छन्त पुले
माक्व पुला बी। छं जिगु पाखें हे

जीवन काये खन धकाः ला धया चवने
माःगु मदु।

२० छं जिमह किजा जूगुलिं जिं छंके
प्रभुया नामय् छता ज्या याना ब्यु
धकाः फवनाचवना। जिगु मन लय्-
ताय्का ब्यु। २१ छं जिं धयागु स्वयाः
नं अप्वः याइ धकाः विश्वास दुगुलिं
थथे चवयाचवनागु खः।

२२ मेगु छता खँ नं धाये — छिमिसं
प्रार्थना यानाचवंगुलिं जि हानं छिमि-
थाय् वये दइ ला धकाः आशा
यानाचवनागु दु। अय्जूगुलिं जितः
क्वथा छकू स्वयाः तया ति।

२३ येशू ख्रीष्टयागु नितिं जि नापं
तुं कुंका चवंह इपाफ्रासं छिमित
ज्वजलपा धया हःगु दु।* २४ जि
नापं ख्रीष्ट येशूयागु ज्या याना चवंपिं
मर्कूस, अरिस्तार्खस, डेमस व लूकां
नं छिमित ज्वजलपा धया हःगु दु।*

२५ प्रभु येशू ख्रीष्टं छिमित दया माया
यानादीमा।

